



I sin lì, a cjâlâ cheste saldature che no vûl tegnî e no savìn ce fâ. E plui che meti lis mans tes braghessis e mateâ cul argagn, russant e messedant, no nus ven tal cjâf nuie di miôr.

Aldo al volarès butâ vie dut e tornâ a tacâ, ma a son palanchis dome di lamiere *Bezonal* e laser *Lumiridiol*.

«Cence contâ il nestri timp butât» i dîs «e se chel orcolat di un premiêr no nus metès a pan e aghe come paie, a cheste ore i saressin za a cjase, a fâ di cene o a parâ sù cu la morose».

Ma Aldo si sbasse, fasint cricâ i zenoi e gratant cu la ponte de ongule su la cunvierie di materiâl saldât mâl.

«Tabae par te, Licio» mi rispuint cuasit secjât «che jo i ceni cun suppostis di *Minarol* e pirùs di *Agonile* par vie di parâ sù, se no mi visi di meti in cjame la pipine bioniche, la sere no si bat claut».

No sai parcè, ma dispès mi dismentei che Aldo nol è propit a plomp e che, dopo jessi finît dentri une turbine fotovoltaiche, nol po plui gloti e nancje doprâ il so imprest come che al faseve prime.

Lûs grîse e zale, buine par buratâ corneis e encefalo, a jentre e e jes dal capanon, filtrade dai nestris ocjâi al Buronio.

«Chei sassins da farie no son ancjemò lâts vie! Se un nol sta atent e al cjale masse di dongje lis lôr lûs al va a finîle che al si sbreghe in doi» i dîs spudant par tiere, sbaliant smire e becant la sô spale.

Aldo, che nancje no si è inacuart, si jeve in pîts, cjalant la puarte taje-uranio che a nus divît

di chel altri repart. «Viôt mo» mi dîs cjalantmi di stuart «a son ta mierde come nô doi, no sta fevelâ mâl di lôr se propit no tu scuegnis. E ancje chê volte pense ben prime di dî alc».

Une cuvierte di materiâl balsamic nus tapone tal moment precîs che une sirene e berle di lontan. «Cjòmo, cumò sî che si scuen lâ vie» mi dîs. «Spessee a resentâti la mûse dal balsamo batteric e 'nin, prime che chei des scovaceris pneumatichis nus lechin i pîts". I scjampin dal repart cuasit corint, cence saludâ chei altris operaios, che a son ancjemò daûr a meti vie imprescj e netâsi muse e mans.

«Diopoi, ogni sere la stesse solfe, i soi stof!» i berli al capanon montant sù ta motorete elioterapiche e fracant il boton "AMCS" (a manete cun sintiment).

La schene imberlade di Aldo mi sta denant, ancje lui stricât dentri de sô motorete modificade par chei come lui. Plui aiar mi passe intor e plui mi sint lizêr, cu la premure di lâ vie di chê zone sporcje e nere che si messede ae salive. Se o pensi che, rivâts dal doimiledusinte, o sin ancjemò daûr a barufâsi par un puest di vore, a spudâsi intor par une saldature mal vignude, a tignîsi da cont une pipine bioniche par colpe di une turbine fotovoltaiche mal comedade, a netâsi vie il polvar balsamic prime che une schirie di britui pneumatics a ti sfondin i sghirets cence cjalâti in muse, beh, mi rint cont che nissun al è stât bon di fâ nuie dal doimiledîs indevant, di cuant che si murive colant di un cuviert, o brusâts dentri di une cisterne, o cjapâts sot di un trabicul cui cingui, o scjafoiâts da puce di fum, o lâts a scais par colpe di un messedot fat mâl o, ancjemò, cuets par dentri dal polvar di amianto, che cumò si dopre par fâ i triciclos dai fruts.

«Mi vegnarès voie di daûr pe schene a chei parsore» i dîs pivotant al ologramma dal muini «ma tant, al sarès dut dibant» e i sorpassi un *sulky* che, diopoi, purtrop nol è mai passât di mode.

**di Renzo Brollo**  
**Conte n. 120**

Par condividi:

Facebook

WhatsApp

Telegram

Print

Email